

Հավելված N 1  
ՀՀ կառավարության 2022 թվականի  
հունիսի 23-ի N 933-Ն որոշման

«Հավելված N 1  
ՀՀ կառավարության 2007 թվականի  
նոյեմբերի 23-ի N 1390-Ն որոշման

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՔԱՂԱՔԱՑԻՈՒԹՅՈՒՆ ՍՏԱՆԱԼՈՒ  
ԵՎ ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՔԱՂԱՔԱՑԻՈՒԹՅՈՒՆԸ  
ԴԱԴԱՐԵՑՆԵԼՈՒ ՀԱՄԱՐ ԱՆՀՐԱԺԵՇՏ ՓԱՍՏԱԹՂԹԵՐԸ  
ՆԵՐԿԱՅԱՑՆԵԼՈՒ, ՔՆՆԱՐԿԵԼՈՒ ԿԱՐԳԸ ԵՎ ԺԱՄԿԵՏՆԵՐԸ

1. Սույն կարգով սահմանվում են Հայաստանի Հանրապետության քաղաքացիություն ստանալու և Հայաստանի Հանրապետության քաղաքացիությունը դադարեցնելու համար նախատեսված փաստաթղթերը ներկայացնելու, քննարկելու ընթացակարգերը, քաղաքացիության հարցերով լիազոր մարմինների կողմից իրականացվող գործողությունների և ժամկետների հետ կապված հարաբերությունները:

2. Հայաստանի Հանրապետության քաղաքացիություն ստանալու կամ Հայաստանի Հանրապետության քաղաքացիությունը դադարեցնելու համար դիմող անձը (այսուհետ՝ դիմումատու) «Հայաստանի Հանրապետության քաղաքացիության մասին» օրենքով (այսուհետ՝ օրենք) սահմանված կարգով Հայաստանի Հանրապետության քաղաքացիություն ստանալու կամ Հայաստանի Հանրապետության քաղաքացիությունը դադարեցնելու համար անձամբ, իսկ օրենքով նախատեսված դեպքերում՝ օրինական ներկայացուցչի միջոցով, սույն որոշմամբ սահմանված փաստաթղթերը ներկայացնում է՝

1) Հայաստանի Հանրապետությունում՝ Ոստիկանություն.

2) օտարերկրյա պետությունում՝ Հայաստանի Հանրապետության դեսպանություն կամ հյուպատոսական հիմնարկ (այսուհետ՝ դեսպանություն կամ հյուպատոսական հիմնարկ), բացառությամբ սույն կարգի 3-րդ կետի 1-ին ենթակետով նախատեսված հիմքով Հայաստանի Հանրապետության քաղաքացիություն

ստանալու համար դիմում ներկայացնելու դեպքերի, որոնք ընդունվում են Ոստիկանությունում:

3. Հայաստանի Հանրապետության քաղաքացիություն ստանալու համար դիմումատուն ներկայացնում է՝

1) օրենքի 13-րդ հոդվածի 1-ին մասով սահմանված հիմքով Հայաստանի Հանրապետության քաղաքացիություն ստանալու համար՝ սույն որոշման N 2 հավելվածով սահմանված ցանկի (այսուհետ՝ ցանկ) 1-ին կետի 1-4-րդ ենթակետերով սահմանված փաստաթղթերը, 5-6-րդ ենթակետերով սահմանված փաստաթղթերը, եթե առկա է ամուսնություն, և դիմումատուն կրում է ամուսնու ազգանունը, 12-13-րդ ենթակետերով սահմանված փաստաթղթերը.

2) օրենքի 13-րդ հոդվածի 2-րդ մասի 1-ին կետով սահմանված՝

ա. մինչև Հայաստանի Հանրապետության քաղաքացիություն ստանալու դիմումը ներկայացնելու պահը վերջին երկու տարվա ընթացքում օրենքով սահմանված կարգով Հայաստանի Հանրապետության քաղաքացու հետ գրանցված ամուսնության մեջ գտնվելու և այդ երկու տարվա ընթացքում առնվազն 365 օր օրինական հիմքերի առկայությամբ Հայաստանի Հանրապետությունում բնակվելու հիմքով Հայաստանի Հանրապետության քաղաքացիություն ստանալու համար՝ ցանկի 1-ին կետի 1-6-րդ, 12-13-րդ ենթակետերով սահմանված փաստաթղթերը,

բ. Հայաստանի Հանրապետության քաղաքացի զավակ ունենալու հիմքով Հայաստանի Հանրապետության քաղաքացիություն ստանալու համար՝ ցանկի 1-ին կետի 1-4-րդ ենթակետերով սահմանված փաստաթղթերը, 5-6-րդ ենթակետերով սահմանված փաստաթղթերը, եթե առկա է ամուսնություն, և դիմումատուն կրում է ամուսնու ազգանունը, 7-րդ, 13-րդ ենթակետերով սահմանված փաստաթղթերը.

3) օրենքի 13-րդ հոդվածի 2-րդ մասի 2-րդ կետով սահմանված՝ դիմումատուի ծնողների կամ նրանցից մեկի նախկինում Հայաստանի Հանրապետության քաղաքացիություն ունենալու կամ նրա Հայաստանի Հանրապետությունում ծնված լինելու և 18 տարին լրանալուց հետո 3 տարվա ընթացքում դիմելու հիմքով Հայաստանի Հանրապետության քաղաքացիություն ստանալու համար՝ ցանկի 1-ին կետի 1-4-րդ ենթակետերով սահմանված փաստաթղթերը, 5-6-րդ ենթակետերով սահմանված

փաստաթղթերը, եթե առկա է ամուսնություն, և դիմումատուն կրում է ամուսնու ազգանունը, 13-րդ ենթակետով սահմանված փաստաթղթերը: Սույն ենթակետով նախատեսված դեպքում դիմումատուն ներկայացնում է նաև ծնողի՝ նախկինում Հայաստանի Հանրապետության քաղաքացիություն ունենալու կամ դիմումատուի Հայաստանի Հանրապետությունում ծնված լինելու փաստը հավաստող փաստաթղթեր:

4) օրենքի 13-րդ հոդվածի 2-րդ մասի 4-րդ կետով սահմանված՝ 1995 թվականի հունվարի 1-ից հետո, իր դիմումի համաձայն, Հայաստանի Հանրապետության քաղաքացիությունից դուրս եկած անձի կողմից կրկին Հայաստանի Հանրապետության քաղաքացիություն ստանալու համար՝ ցանկի 1-ին կետի 1-4-րդ ենթակետերով սահմանված փաստաթղթերը, 5-6-րդ ենթակետերով նախատեսված փաստաթղթերը, եթե առկա է ամուսնություն, և դիմումատուն կրում է ամուսնու ազգանունը, 13-րդ կետով սահմանված փաստաթղթերը:

5) օրենքի 13-րդ հոդվածի 2-րդ մասի 5-րդ կետով սահմանված հիմքով Հայաստանի Հանրապետության քաղաքացիություն ստանալու համար՝ Հայաստանի Հանրապետությունում փախստական ճանաչված անձը ներկայացնում է ցանկի 1-ին կետի 1-ին, 3-րդ, 4-րդ, 11-րդ և 13-րդ կետերով սահմանված փաստաթղթերը, 5-6-րդ ենթակետերով նախատեսված փաստաթղթերը, եթե առկա է ամուսնություն, և դիմումատուն կրում է ամուսնու ազգանունը, իսկ Հայաստանի Հանրապետությունում բնակվող՝ քաղաքացիություն չունեցող անձը ներկայացնում է նույն ցանկի 1-ին կետի 1-ին, 3-րդ, 4-րդ ենթակետերով սահմանված փաստաթղթերը, 5-6-րդ ենթակետերով նախատեսված փաստաթղթերը, եթե առկա է ամուսնություն, և դիմումատուն կրում է ամուսնու ազգանունը, 10-րդ և 13-րդ ենթակետերով սահմանված փաստաթղթերը:

6) օրենքի 13-րդ հոդվածի 3-րդ մասով սահմանված հիմքով՝ Հայաստանի Հանրապետության քաղաքացիություն չունեցող ազգությամբ հայ անձի կամ անգործունակ անձի, որի խնամակալը Հայաստանի Հանրապետության քաղաքացի է, Հայաստանի Հանրապետության քաղաքացիություն ստանալու համար՝ ցանկի 1-ին կետի 1-4-րդ ենթակետերով սահմանված փաստաթղթերը, 5-6-րդ ենթակետերով

նախատեսված փաստաթղթերը, եթե առկա է ամուսնություն, և դիմումատուն կրում է ամուսնու ազգանունը, 8-րդ և 9-րդ ենթակետերով սահմանված փաստաթղթերից որևէ մեկը, 13-րդ ենթակետով սահմանված փաստաթղթերը: Սույն ենթակետի հիմքով անձի՝ Հայաստանի Հանրապետության քաղաքացիություն ստանալու դիմումը խնամակալի միջոցով ներկայացվելու դեպքում դիմումին կցվում է նաև խնամակալությունը հաստատող փաստաթուղթը և Հայաստանի Հանրապետության քաղաքացու անձնագիրը:

4. Սույն կարգի 3-րդ կետով սահմանված փաստաթղթերն օտար լեզվով կազմված լինելու դեպքում դիմումատուն ներկայացնում է նաև դրանց՝ օրենքով սահմանված կարգով կատարված և վավերացված հայերեն թարգմանությունները:

5. Ցանկի 1-ին կետի 8-րդ ենթակետի «ա» և «գ» պարբերություններով նախատեսված փաստաթղթերը հաստատվում են դեսպանության կամ հյուպատոսական հիմնարկի կողմից:

6. Սույն կարգի 3-րդ կետով նախատեսված դեպքերում փաստաթղթերը ներկայացնելիս դիմումատուն լրացնում է դիմում-հարցաթերթ՝ համաձայն N 1 ձևի: Սույն կարգի 3-րդ կետի 1-ին ենթակետով նախատեսված դեպքում՝ Հայաստանի Հանրապետության կառավարության 2007 թվականի օգոստոսի 30-ի N 1040-Ն որոշման հավելվածի 8-րդ կետի պահանջի կատարումն ապահովելու նպատակով դիմում-հարցաթերթը դիմումատուն լրացնում է անձամբ՝ Ոստիկանությունում կամ դեսպանությունում կամ հյուպատոսական հիմնարկում:

7. Դիմում-հարցաթերթը լրացվում է հայերենով՝ ընթեռնելի, առանց ուղղումների և ջնջումների: Դիմում-հարցաթերթը ստորագրում են դիմումատուն և դիմումն ընդունող պաշտոնատար անձը:

8. Ոստիկանությունը կամ դեսպանությունը կամ հյուպատոսական հիմնարկը ստուգում է փաստաթղթերի ամբողջականությունը, սույն որոշման N 2 հավելվածով հաստատված ցանկի 1-ին կետի 2-րդ, 4-12-րդ ենթակետերով նախատեսված փաստաթղթերի բնօրինակները պատճենների հետ համեմատելուց անմիջապես հետո վերադարձնում է դիմումատուին:

9. Փաստաթղթերը Ոստիկանություն ներկայացնելու դեպքում, եթե ապահովված է դրանց ամբողջականությունը, Ոստիկանությունը մուտքագրում է դիմումը, դիմումատուի համար էլեկտրոնային շտեմարանի միջոցով ձևավորում և նրան է տրամադրում անհատական ծածկագիր, որը հնարավորություն է տալիս վերջինիս հետևել իր դիմումի ընթացքին: Փաստաթղթերի ամբողջականությունն ապահովված չլինելու դեպքում Ոստիկանությունում քաղաքացիություն ստանալու դիմումին ընթացք չի տրվում, այլ դիմումատուին գրավոր պարզաբանվում է փաստաթղթերը համալրելու և կրկին դիմում ներկայացնելու անհրաժեշտության մասին:

10. Փաստաթղթերը դեպքում կամ հյուպատոսական հիմնարկ ներկայացնելու դեպքում, եթե ապահովված է դրանց ամբողջականությունը, ապա դիմումատուին տրամադրվում է ստացական, որը հավաստում է դիմումը մուտքագրելու հանգամանքը: Եթե դեպքում կամ հյուպատոսական հիմնարկ ներկայացված փաստաթղթերի ցանկն ամբողջական չէ, ապա դիմումն ընդունվում է, և դիմումատուին առաջարկվում է 5-օրյա ժամկետում համալրել այդ ցանկը: Այս դեպքում ստացականը տրամադրվում է փաստաթղթերը համալրելու օրը, որն էլ համարվում է դիմումի ընդունման օր:

11. Սույն կարգի 3-րդ կետի 2-4-րդ ենթակետերով նախատեսված դեպքերում դեպքում կամ հյուպատոսական հիմնարկը, իսկ փաստաթղթերը Ոստիկանություն ներկայացնելիս կարգի 3-րդ կետի 1-4-րդ ենթակետերով նախատեսված դեպքում՝ Ոստիկանությունը, դրանք ստանալուց հետո ոչ ուշ, քան 2 աշխատանքային օրվա ընթացքում, անձի համար նշանակում է Հայաստանի Հանրապետության Սահմանադրության իմացության ստուգման օր:

12. Դեպքում կամ հյուպատոսական հիմնարկը փաստաթղթերն ստանալուց հետո, իսկ սույն կարգի 3-րդ կետի 1-4-րդ ենթակետերում նշված դեպքերում՝ Հայաստանի Հանրապետության Սահմանադրության իմացության սահմանված կարգով ստուգման դրական արդյունքի դեպքում՝ 10 աշխատանքային օրվա ընթացքում փաստաթղթերը և դրանց վերաբերյալ եզրակացությունն ուղարկում է Արտաքին գործերի նախարարություն (այսուհետ՝ նախարարություն):

13. Նախարարությունը փաստաթղթերն ստանալուց հետո 3 աշխատանքային օրվա ընթացքում դրանք ուղարկում է Ոստիկանություն: Ոստիկանությունը նախարարությունից փաստաթղթերը ստանալուց և մուտքագրելուց հետո դիմումատուի համար էլեկտրոնային շտեմարանի միջոցով ձևավորում և դիմում-հարցաթերթում նրա կողմից լրացված էլեկտրոնային փոստի հասցեին է ուղարկում անհատական ծածկագիր, որը հնարավորություն է տալիս վերջինիս հետևել իր դիմումի ընթացքին:

14. Ոստիկանությունը դիմումը մուտքագրելուց, իսկ սույն կարգի 13-րդ կետով նախատեսված դեպքերում՝ նախարարությունից ուղարկված փաստաթղթերը ստանալուց հետո 15 աշխատանքային օրվա ընթացքում դրանք ուղարկում է Ազգային անվտանգության ծառայություն՝ կցելով իր կողմից Ոստիկանությունում գործող համակարգերով իրականացված ստուգումների արդյունքում դիմումատուի վերաբերյալ ձեռք բերված տեղեկությունները:

15. Ազգային անվտանգության ծառայությունը փաստաթղթերը ստանալուց հետո 15 աշխատանքային օրվա ընթացքում Ոստիկանություն է ներկայացնում իր եզրակացությունը: Լրացուցիչ ուսումնասիրություններ կատարելու անհրաժեշտության դեպքերում Ազգային անվտանգության ծառայությունը եզրակացությունը ներկայացնելու ժամկետը կարող է երկարաձգել ևս 10 աշխատանքային օրով:

16. Ազգային անվտանգության ծառայության եզրակացությունն ստանալուց հետո Ոստիկանությունը կազմում է առանձին եզրակացություն, որում ամփոփվում են նախարարության և Ազգային անվտանգության ծառայության եզրակացությունները: Ոստիկանության եզրակացությունը հաստատվում է Ոստիկանության անձնագրային և վիզաների վարչության պետի (տեղակալի) կողմից:

17. Հայաստանի Հանրապետության քաղաքացիություն ստանալու դիմումի կապակցությամբ կազմված դրական եզրակացությունները Ոստիկանությունը 25 աշխատանքային օրվա ընթացքում առաջարկությամբ ուղարկում է Հայաստանի Հանրապետության նախագահին՝ կցելով Հայաստանի Հանրապետության նախագահի համապատասխան հրամանագրի նախագիծը:

18. Հայաստանի Հանրապետության քաղաքացիություն ստանալու դիմումի վերաբերյալ կազմված բացասական եզրակացությունները Ոստիկանությունը 10

աշխատանքային օրվա ընթացքում ուղարկում է Քաղաքացիության հարցերով միջգերատեսչական հանձնաժողով:

19. Քաղաքացիության հարցերով միջգերատեսչական հանձնաժողովը եզրակացությունները քննարկում է հանձնաժողովի ղեկավարի կողմից հրավիրվող նիստերում՝ 10 աշխատանքային օրվա ընթացքում: Քննարկման արդյունքում կազմվում են ամփոփ եզրակացություններ և ուղարկվում Ոստիկանություն:

20. Ոստիկանությունը սույն կարգի 19-րդ կետով սահմանված եզրակացություններն ստանալուց հետո 8 աշխատանքային օրվա ընթացքում Հայաստանի Հանրապետության նախագահին ներկայացնում է քաղաքացիություն ստանալու դիմում ներկայացրած անձին քաղաքացիություն շնորհելու կամ քաղաքացիության շնորհումը մերժելու մասին առաջարկություն՝ կցելով Հայաստանի Հանրապետության նախագահի համապատասխան հրամանագրի նախագիծը և Քաղաքացիության հարցերով միջգերատեսչական հանձնաժողովի եզրակացությունը:

21. Հայաստանի Հանրապետության քաղաքացիություն շնորհելու կամ քաղաքացիություն ստանալու դիմումը մերժելու մասին հրամանագրերը Հայաստանի Հանրապետության նախագահի աշխատակազմն ուղարկում է նախարարություն և Ոստիկանություն:

22. Հայաստանի Հանրապետության քաղաքացիություն ստանալու դիմումը մերժելու դեպքում Հայաստանի Հանրապետության նախագահի հրամանագիրը ստանալուց հետո Ոստիկանությունը՝ Ոստիկանության անձնագրային և վիզաների վարչության, իսկ նախարարությունը՝ դեսպանության կամ հյուպատոսական հիմնարկի միջոցով 5 աշխատանքային օրվա ընթացքում գրավոր ծանուցում է դիմումատուին:

23. Հայաստանի Հանրապետության քաղաքացիություն ստանալու դիմումը բավարարելու դեպքում՝ դիմումատուն գրավոր ծանուցվում է Հայաստանի Հանրապետության կառավարության 2007 թվականի նոյեմբերի 1-ի N 1290-Ն որոշմամբ սահմանված կարգով և ժամկետում: Հայաստանի Հանրապետության քաղաքացիություն շնորհելու մասին ծանուցման մեջ նշվում է երդման արարողությանը

մասնակցելու և անձնագիր ստանալու համար Ոստիկանություն կամ դեսպանություն կամ հյուպատոսական հիմնարկ ներկայանալու անհրաժեշտության մասին:

24. Սույն կարգի 22-րդ և 23-րդ կետերով նախատեսված գրավոր ծանուցումներն ուղարկվում են այն դեպքում, երբ դիմումատուն դիմում-հարցաթերթում չի լրացրել իր էլեկտրոնային փոստի հասցեն և (կամ) Հայաստանի Հանրապետության տարածքում գործող բջջային հեռախոսահամար: Դիմում-հարցաթերթում բջջային հեռախոսահամար և (կամ) էլեկտրոնային փոստի հասցե լրացված լինելու և ծանուցումներն այդ հասցեով ստանալու վերաբերյալ դիմումատուի համաձայնության առկայության դեպքում ծանուցումներն ուղարկվում են բջջային հեռախոսին և (կամ) դիմումատուի կողմից նշված էլեկտրոնային փոստի հասցեին, որից հետո դիմումատուն համարվում է պատշաճ ծանուցված: Այս դեպքում՝ երդման արարողությանը մասնակցելու և անձնագիր ստանալու համար Ոստիկանություն կամ դեսպանության կամ հյուպատոսական հիմնարկ ներկայանալու անհրաժեշտության մասին նշվում է էլեկտրոնային փոստի հասցեին և (կամ) բջջային հեռախոսահամարին ուղարկվող հաղորդագրության մեջ:

25. Հայաստանի Հանրապետության քաղաքացիություն ձեռք բերած անձը Հայաստանի Հանրապետության քաղաքացու անձը հաստատող փաստաթուղթ ստանում է Ոստիկանությունում կամ դեսպանությունում կամ հյուպատոսական հիմնարկում՝ երդման արարողակարգին մասնակցելու և անձը հաստատող փաստաթուղթ ստանալու դիմում ներկայացնելու դեպքում՝ օրենքով սահմանված կարգով և ժամկետներում:

26. Հայաստանի Հանրապետության քաղաքացիությունը դադարեցնելու համար դիմումատուն Ոստիկանություն կամ դեսպանություն կամ հյուպատոսական հիմնարկ է ներկայացնում ցանկի 2-րդ կետով նախատեսված փաստաթղթերը: Փաստաթղթերը ներկայացնելիս լրացվում է դիմում-հարցաթերթ՝ համաձայն N 2 ձևի:

27. Սույն որոշման N 2 հավելվածով հաստատված ցանկի 2-րդ կետի 3-րդ, 5-րդ և 6-7-րդ, 9-10-րդ ենթակետերով սահմանված փաստաթղթերն օտար լեզվով կազմված լինելու դեպքում դիմումատուն ներկայացնում է նաև դրանց օրենքով սահմանված կարգով կատարված և վավերացված հայերեն թարգմանությունները:



28. Ոստիկանությունը կամ դեսպանությունը կամ հյուպատոսական հիմնարկը ստուգում է փաստաթղթերի ամբողջականությունը, ցանկի 2-րդ կետի 2-րդ, 3-րդ, 5-7-րդ, 9-րդ ենթակետերով նախատեսված փաստաթղթերի բնօրինակները պատճենների հետ համեմատելուց անմիջապես հետո վերադարձնում է դիմումատուին:

29. Փաստաթղթերը Ոստիկանություն ներկայացնելու դեպքում, եթե ապահովված է դրանց ամբողջականությունը, ապա Ոստիկանությունը մուտքագրում է դիմումը, դիմումատուի համար էլեկտրոնային շտեմարանի միջոցով ձևավորում և նրան է տրամադրում անհատական ծածկագիր, որը հնարավորություն է տալիս վերջինիս հետևել իր դիմումի ընթացքին: Փաստաթղթերի ամբողջականությունն ապահովված չլինելու դեպքում Ոստիկանությունում քաղաքացիություն ստանալու դիմումին ընթացք չի տրվում, այլ դիմումատուին գրավոր պարզաբանվում է փաստաթղթերը համալրելու և կրկին դիմում ներկայացնելու անհրաժեշտության մասին:

30. Փաստաթղթերը դեսպանություն կամ հյուպատոսական հիմնարկ ներկայացնելու դեպքում, եթե ապահովված է դրանց ամբողջականությունը, ապա դիմումատուին տրամադրվում է ստացական, որը հավաստում է դիմումը մուտքագրելու հանգամանքը: Եթե դեսպանություն կամ հյուպատոսական հիմնարկ ներկայացված փաստաթղթերի ցանկն ամբողջական չէ, ապա դիմումը մուտքագրվում է, և դիմումատուին առաջարկվում է 5-օրյա ժամկետում համալրել այդ ցանկը: Այս դեպքում ստացականը տրամադրվում է փաստաթղթերը համալրելու օրը, որն էլ համարվում է դիմումի ընդունման օր:

31. Դեսպանությունը կամ հյուպատոսական հիմնարկը փաստաթղթերն ընդունելուց հետո 10 աշխատանքային օրվա ընթացքում դրանք իր եզրակացությամբ ուղարկում է նախարարություն: Նախարարությունը փաստաթղթերն ստանալուց հետո 3 աշխատանքային օրվա ընթացքում դրանք ուղարկում է Ոստիկանություն: Ոստիկանությունը նախարարությունից փաստաթղթերը ստանալուց և մուտքագրելուց հետո դիմումատուի համար էլեկտրոնային շտեմարանի միջոցով ձևավորում և դիմում-հարցաթերթում նրա կողմից լրացված էլեկտրոնային փոստի հասցեին է ուղարկում անհատական ծածկագիր, որը հնարավորություն է տալիս վերջինիս հետևել իր դիմումի ընթացքին:

32. Ոստիկանությունը դիմումը մուտքագրելուց, իսկ սույն կարգի 31-րդ կետով նախատեսված դեպքերում՝ նախարարությունից ուղարկված փաստաթղթերը ստանալուց հետո 15 աշխատանքային օրվա ընթացքում դիմումատուի՝

1) պետության հանդեպ չկատարված հարկային կամ հանրային իրավական դրամական պարտավորությունների վերաբերյալ հարցում է կատարում Պետական եկամուտների կոմիտե և Հարկադիր կատարումն ապահովող ծառայություն, Հայաստանի Հանրապետության պետական եկամուտների կոմիտեից անձի՝ պետության հանդեպ չկատարված պարտավորությունների վերաբերյալ տեղեկությունների ստացման նպատակով հարցումը և Հայաստանի Հանրապետության պետական եկամուտների կոմիտեի կողմից տրամադրվող տեղեկությունները փոխանակվում են էլեկտրոնային եղանակով՝ ՎԵԲ ծառայության միջոցով, որի նկարագիրը սահմանում է Հայաստանի Հանրապետության պետական եկամուտների կոմիտեի նախագահը.

2) «Պաշտպանության մասին» և «Զինվորական ծառայության և զինծառայողի կարգավիճակի մասին» օրենքներով նախատեսված պարտավորությունների վերաբերյալ հարցում է կատարում Հայաստանի Հանրապետության պաշտպանության նախարարություն.

3) անձի նկատմամբ դատարանի՝ օրինական ուժի մեջ մտած և կատարման ենթակա դատավճռի կամ վճռի առկայությունը պարզելու նպատակով հարցում է կատարում Հայաստանի Հանրապետության դատական դեպարտամենտ: Անձի նկատմամբ օրինական ուժի մեջ մտած և կատարման ենթակա դատավճիռ կամ վճիռ առկա լինելու մասին Հայաստանի Հանրապետության դատական դեպարտամենտից տեղեկություն ստանալու դեպքում Ոստիկանությունը եռօրյա ժամկետում դրա կատարման ընթացքի վերաբերյալ հարցում է կատարում Քրեակատարողական ծառայություն և Հարկադիր կատարումն ապահովող ծառայություն.

4) Հայաստանի Հանրապետության քաղաքացիությունից դուրս գալը Հայաստանի Հանրապետության պետական անվտանգության շահերին հակասելու հանգամանքը պարզելու և եզրակացություն ստանալու նպատակով հարցում է կատարում

րում Ազգային անվտանգության ծառայություն՝ կցելով իր կողմից Ոստիկանությունում գործող համակարգերով իրականացված ստուգումների արդյունքում դիմումատուի վերաբերյալ ձեռք բերված տեղեկությունները:

33. Սույն կարգի 32-րդ կետով նախատեսված հարցումներն ուղարկելու հետ միաժամանակ ուղարկվում են նաև անձի վերաբերյալ բնակչության պետական ռեգիստրում առկա այն տվյալները, որոնք նախկինում ենթարկվել են փոփոխության:

34. Սույն կարգի 32-րդ կետում նշված մարմինները հարցումներին պատասխանում են 5 աշխատանքային օրվա, իսկ Ազգային անվտանգության ծառայությունը՝ 10 աշխատանքային օրվա ընթացքում: Լրացուցիչ ուսումնասիրություններ կատարելու անհրաժեշտության դեպքերում Ազգային անվտանգության ծառայությունը եզրակացություն ներկայացնելու ժամկետը կարող է երկարաձգել մինչև 10 աշխատանքային օրով:

35. Սույն կարգի 32-րդ կետում նշված մարմիններից հարցումների պատասխանները և Ազգային անվտանգության ծառայության եզրակացությունը ստանալուց հետո Ոստիկանությունը կազմում է ամփոփ եզրակացություն, որը հաստատվում է Ոստիկանության անձնագրային և վիզաների վարչության պետի (տեղակալի) կողմից: Սույն կարգի 32-րդ կետում նշված մարմիններից դիմումատուի՝ պետության հանդեպ պարտավորություն ունենալու վերաբերյալ պատասխան ստանալու դեպքում Ոստիկանությունն այդ մասին 7 աշխատանքային օրվա ընթացքում գրավոր ծանուցում է ուղարկում դիմումատուին՝ 20 աշխատանքային օրվա ընթացքում պարտավորությունը մարելու և անձամբ կամ լիազորված անձի միջոցով համապատասխան հավաստում Ոստիկանություն ներկայացնելու համար: Հավաստումը ստանալուց հետո Ոստիկանությունը 5 աշխատանքային օրվա ընթացքում կրկին հարցում է ուղարկում սույն կարգի 32-րդ կետով սահմանված՝ անձի պետության հանդեպ պարտավորություն ունենալու վերաբերյալ փաստաթուղթ տրամադրած մարմին, որը 5 աշխատանքային օրվա ընթացքում նշված փաստաթղթի իսկությունը հաստատող կամ հերքող պատասխանն ուղարկում է Ոստիկանություն: Սույն կետում

նշված ժամկետները լրանալուց հետո սույն կետով նախատեսված եզրակացությունը Ոստիկանությունը կազմում է տվյալ պահին առկա փաստաթղթերի հիման վրա: Դիմում-հարցաթերթում էլեկտրոնային փոստի հասցե լրացված լինելու և ծանուցումներն այդ հասցեով ստանալու վերաբերյալ դիմումատուի համաձայնության առկայության դեպքում սույն կետում նշված ծանուցումներն ուղարկվում են դիմումատուի կողմից նշված էլեկտրոնային փոստի հասցեին, որից հետո դիմումատուն համարվում է պատշաճ ծանուցված:

36. Հայաստանի Հանրապետության քաղաքացիությունը դադարեցնելու դիմումի կապակցությամբ կազմված դրական եզրակացությունները Ոստիկանությունը 30 աշխատանքային օրվա ընթացքում առաջարկությամբ ուղարկում է Հայաստանի Հանրապետության նախագահին՝ կցելով Հայաստանի Հանրապետության նախագահի համապատասխան հրամանագրի նախագիծը:

37. Հայաստանի Հանրապետության քաղաքացիությունը դադարեցնելու դիմումի վերաբերյալ կազմված բացասական եզրակացությունները Ոստիկանությունը 15 աշխատանքային օրում ուղարկում է Քաղաքացիության հարցերով միջգերատեսչական հանձնաժողով, որը սույն կարգի 19-րդ կետով սահմանված կարգով և ժամկետներում քննարկում է դրանք և ամփոփ եզրակացություններն ուղարկում Ոստիկանություն:

38. Ոստիկանությունը սույն կարգի 37-րդ կետով սահմանված եզրակացությունները Հայաստանի Հանրապետության նախագահին է ներկայացնում սույն կարգի 20-րդ կետով սահմանված ընթացակարգով:

39. Հայաստանի Հանրապետության քաղաքացիությունը դադարեցնելու դիմումները բավարարելու կամ մերժելու մասին հրամանագրերը Հայաստանի Հանրապետության նախագահի աշխատակազմն ուղարկում է նախարարություն և Ոստիկանություն:

40. Հայաստանի Հանրապետության քաղաքացիությունը դադարեցնելու դիմումը մերժելու կամ բավարարելու դեպքում նախագահի հրամանագիրը ստանալուց հետո Ոստիկանությունը՝ Ոստիկանության անձնագրային և վիզաների վարչության, իսկ նախարարությունը՝ դեսպանության կամ հյուպատոսական

հիմնարկի միջոցով 5 աշխատանքային օրվա ընթացքում գրավոր ծանուցում է դիմումատուին: Սույն կետով նշված գրավոր ծանուցումներն ուղարկվում են այն դեպքում, երբ դիմումատուն դիմում-հարցաթերթում չի լրացրել իր էլեկտրոնային փոստի հասցեն և (կամ) Հայաստանի Հանրապետության տարածքում գործող բջջային հեռախոսահամար: Դիմում-հարցաթերթում բջջային հեռախոսահամար և (կամ) էլեկտրոնային փոստի հասցե լրացված լինելու և ծանուցումներն այդ հասցեով ստանալու վերաբերյալ դիմումատուի համաձայնության առկայության դեպքում ծանուցումներն ուղարկվում են բջջային հեռախոսին և (կամ) դիմումատուի կողմից նշված էլեկտրոնային փոստի հասցեին, որից հետո դիմումատուն համարվում է պատշաճ ծանուցված:

41. Հայաստանի Հանրապետության քաղաքացիությունը դադարեցնելու դիմումը բավարարելու դեպքում, եթե դիմումատուն Հայաստանի Հանրապետության քաղաքացիությունը դադարեցնելու համար ներկայացրել է օրենքի 24-րդ հոդվածի 3-րդ մասով նախատեսված՝ օտարերկրյա պետության իրավասու մարմնի տված՝ տվյալ պետության քաղաքացիություն ձեռք բերելու իրավական հնարավորության մասին գրավոր հավաստում (տեղեկանք), ապա ծանուցման մեջ նշում է կատարվում հրամանագիրն ուժի մեջ մտնելու համար օտարերկրյա պետության կողմից տրված անձնագիր կամ օրենքով սահմանված կարգով վավերացված՝ տվյալ պետության քաղաքացիություն ձեռք բերելը հավաստող փաստաթուղթ ներկայացնելու անհրաժեշտության մասին: Սույն կետում նշված դեպքերում՝ օտարերկրյա պետության կողմից տրված անձնագրում կամ օրենքով սահմանված կարգով վավերացված՝ տվյալ պետության քաղաքացիություն ձեռք բերելը հավաստող փաստաթղթում Հայաստանի Հանրապետության քաղաքացիությունը դադարեցրած անձի անհատական տվյալներում փոփոխությունների առկայության դեպքում ներկայացվում է նաև փոփոխությունը հավաստող փաստաթուղթ:

42. Հայաստանի Հանրապետության քաղաքացիությունը դադարեցնելու մասին դիմումը բավարարելու դեպքում Ոստիկանությունը կամ դեսպանությունը

կամ հյուպատոսական հիմնարկը դիմումատուի կողմից Հայաստանի Հանրապետության քաղաքացու անձնագիրը հանձնելուց հետո 5 աշխատանքային օրվա ընթացքում վերջինիս տրամադրում է Հայաստանի Հանրապետության քաղաքացիությունը դադարեցնելու փաստը հավաստող տեղեկանք: Ընդ որում՝

1) եթե դիմումատուն Հայաստանի Հանրապետության քաղաքացիությունը դադարեցնելու համար ներկայացրել է օտարերկրյա պետության անձնագիր, ապա նրա քաղաքացիությունը համարվում է դադարեցված ծանուցման պահից, և նրան տրամադրվում է տեղեկանք՝ համաձայն N 3 ձևի.

2) եթե դիմումատուն Հայաստանի Հանրապետության քաղաքացիությունը դադարեցնելու համար ներկայացրել է օրենքի 24-րդ հոդվածի 3-րդ մասով նախատեսված՝ օտարերկրյա պետության իրավասու մարմնի տված՝ տվյալ պետության քաղաքացիություն ձեռք բերելու իրավական հնարավորության մասին գրավոր հավաստում (տեղեկանք), ապա նրան տրամադրվում է տեղեկանք՝ համաձայն N 4 ձևի, որում նշում է կատարվում այն մասին, որ Հայաստանի Հանրապետության քաղաքացիությունը դադարեցնելու վերաբերյալ Հայաստանի Հանրապետության նախագահի հրամանագիրն ուժի մեջ կմտնի նրա կողմից օտարերկրյա պետության քաղաքացիություն ստանալու ապացույցը (օտարերկրյա պետության անձնագիր կամ օրենքով սահմանված կարգով վավերացված՝ տվյալ պետության քաղաքացիություն ձեռք բերելը հավաստող փաստաթուղթ) լիազոր մարմին ներկայացվելու պահից: Օտարերկրյա պետության քաղաքացիություն ստանալու ապացույցը ներկայացնելուց հետո դիմումատուին տրամադրվում է սույն կետի 1-ին ենթակետով նախատեսված տեղեկանքը.

3) սույն կետի 1-ին ենթակետով նախատեսված տեղեկանքը տրամադրելու օրվանից 30 աշխատանքային օրվա ընթացքում Ոստիկանությունը կամ դեսպանությունը կամ հյուպատոսական հիմնարկը զինվորական հաշվառման վերցված դիմումատուի Հայաստանի Հանրապետության քաղաքացիությունը դադարեցնելու մասին գրավոր տեղեկացնում է Հայաստանի Հանրապետության պաշտպանության նախարարության զորակոչային և զորահավաքային համալրման ծառայությանը՝ դիմումատուին զինվորական հաշվառումից հանելու նպատակով:

43. Դիմումատուի կողմից սույն որոշման 42-րդ կետի 2-րդ ենթակետով սահմանված՝ օտարերկրյա պետության քաղաքացիություն ստանալու ապացույցը դեպքում կամ հյուպատոսական հիմնարկ ներկայացնելու դեպքում, քաղաքացիությունը դադարեցված համարելու վերաբերյալ N 3 ձևի տեղեկանքը տրամադրելու հետ միաժամանակ դեպքում կամ հյուպատոսական հիմնարկը նախարարության միջոցով 3 աշխատանքային օրվա ընթացքում տեղեկացնում է Ոստիկանությանը՝ բնակչության պետական ռեգիստրում համապատասխան նշում կատարելու և դիմումատուի Հայաստանի Հանրապետության քաղաքացու անձը հաստատող փաստաթուղթն անվավեր ճանաչելու համար, կցելով նաև օտարերկրյա պետության անձնագրի կամ քաղաքացիություն ստանալու հանգամանքը հիմնավորող փաստաթղթի օրենքով սահմանված կարգով կատարված թարգմանությունը: Դեպքում կամ հյուպատոսական հիմնարկը դիմողի ցանկությամբ տեղեկանքը կարող է տրամադրել անգլերեն կամ նստավայր պետության պաշտոնական լեզվով:

44. Երեխայի Հայաստանի Հանրապետության քաղաքացիությունը դադարեցնելու համար ծնողը (օրինական ներկայացուցիչը) Ոստիկանություն կամ դեպքում կամ հյուպատոսական հիմնարկ է ներկայացնում սույն որոշման 2-րդ հավելվածով հաստատված ցանկի 3-րդ կետով նախատեսված փաստաթղթերը: Փաստաթղթերը ներկայացնելիս լրացվում է դիմում-հարցաթերթ՝ համաձայն N 5 ձևի:

45. Սույն որոշման 2-րդ հավելվածով հաստատված ցանկի 3-րդ կետի 3-րդ, 5-7-րդ, 9-10-րդ ենթակետերով սահմանված փաստաթղթերը օտար լեզվով կազմված լինելու դեպքում դիմումատուն ներկայացնում է նաև դրանց օրենքով սահմանված կարգով կատարված և վավերացված հայերեն թարգմանությունները:

46. Տասնչորսից մինչև տասնութ տարեկան երեխան Հայաստանի Հանրապետության քաղաքացիությունը դադարեցնելու համար անձամբ Ոստիկանությունում կամ դեպքում կամ հյուպատոսական հիմնարկում տալիս է իր գրավոր համաձայնությունը: Երեխայի անձամբ ներկայանալու անհնարինության դեպքում դիմումատուն ներկայացնում է երեխայի՝ օրենքով սահմանված կարգով վավերացված համաձայնությունը:

47. Երեխայի քաղաքացիությունը դադարեցնելու վերաբերյալ դիմումը Ոստիկանություն մուտքագրվում, իսկ դեսպանություն կամ հյուպատոսական հիմնարկ ներկայացված լինելու դեպքում Ոստիկանություն է ուղարկվում սույն կարգի 28-31-րդ կետերով սահմանված կարգով և ժամկետներում:

48. Ոստիկանությունը դիմումը մուտքագրելուց, իսկ դիմումը դեսպանություն կամ հյուպատոսական հիմնարկ ներկայացված լինելու դեպքում նախարարությունից ուղարկված փաստաթղթերը ստանալուց հետո 10 աշխատանքային օրվա ընթացքում տասնչորսից մինչև տասնութ տարեկան քաղաքացիների՝ «Պաշտպանության մասին» և «Զինվորական ծառայության և զինծառայողի կարգավիճակի մասին» օրենքներով նախատեսված պարտավորությունների վերաբերյալ հարցում է կատարում Հայաստանի Հանրապետության պաշտպանության նախարարություն, որը հարցմանը պատասխանում է 5 աշխատանքային օրվա ընթացքում:

49. Սույն կարգի 48-րդ կետով նախատեսված հարցումներն ուղարկելու հետ միաժամանակ ուղարկվում են նաև անձի վերաբերյալ բնակչության պետական ռեգիստրում առկա այն տվյալները, որոնք նախկինում ենթարկվել են փոփոխության:

50. Հայաստանի Հանրապետության պաշտպանության նախարարությունից հարցման պատասխանը ստանալուց հետո Ոստիկանությունը կազմում է ամփոփ եզրակացություն, որը հաստատվում է Ոստիկանության անձնագրային և վիզաների վարչության պետի (տեղակալի) կողմից:

51. Երեխայի քաղաքացիություն դադարեցնելու վերաբերյալ դիմումի քննարկման հետագա ընթացակարգերի նկատմամբ տարածվում են սույն կարգի 36-43-րդ կետերի պահանջները:

52. Մինչև նախագահի կողմից Հայաստանի Հանրապետության քաղաքացիություն շնորհելու կամ Հայաստանի Հանրապետության քաղաքացիությունը դադարեցնելու վերաբերյալ հրամանագրի ստորագրումը՝ այդ հրամանագրին առնչվող փաստաթղթերում կատարված որևէ փոփոխության դեպքում նախարարությունը, Ոստիկանությունը կամ Ազգային անվտանգության ծառայությունը դրա



մասին անմիջապես գրավոր տեղեկացնում են Հայաստանի Հանրապետության նախագահին:

53. Հայաստանի Հանրապետության քաղաքացիություն ստանալու և Հայաստանի Հանրապետության քաղաքացիությունը դադարեցնելու համար զանձվում է պետական տուրք՝ օրենքով սահմանված չափով և կարգով:

54. Սույն կարգով նախատեսված դեպքերում Հայաստանի Հանրապետության քաղաքացիություն ստանալու և Հայաստանի Հանրապետության քաղաքացիությունը դադարեցնելու մասին դիմումների ընթացքի վերաբերյալ տեղեկությունները (դիմումները Ոստիկանություն մուտքագրվելու, դիմումների վերաբերյալ եզրակացությունները Քաղաքացիության հարցերով միջգերատեսչական հանձնաժողով կամ Հայաստանի Հանրապետության նախագահին ուղարկվելու, Հայաստանի Հանրապետության քաղաքացիություն շնորհելու (դադարեցնելու) դիմումը բավարարելու կամ մերժելու մասին Հայաստանի Հանրապետության նախագահի հրամանագիրը ստացվելու) Ոստիկանությունը դիմումատուի էլեկտրոնային փոստի հասցեին և (կամ) բջջային հեռախոսահամարին՝ SMS (էսէմէս) հաղորդագրությամբ ուղարկում է 3 աշխատանքային օրվա ընթացքում:

55. Դիմումատուն դիմումի ընթացքի վերաբերյալ կարող է տեղեկանալ նաև Ոստիկանության պաշտոնական ինտերնետային կայքի միջոցով՝ մուտքագրելով իրեն տրված անհատական ծածկագիրը:»:

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ  
ՎԱՐՉԱՊԵՏԻ ԱՇԽԱՏԱԿԱԶՄԻ  
ՂԵԿԱՎԱՐ

Ա. ՀԱՐՈՒԹՅՈՒՆՅԱՆ